

# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava  
Va ina kosmac !!

Lerdeaksat ke 2023

11<sup>e</sup> otuk







## Kolima, sovietafa Gulag stolexo

Kolima tir gola ke rossiafa Sumefa Roneka, vanpiyisa gijotaxo ke divkawodara bak XX-eafa decemda yoke poana kobara.

Yolt ke gola tir vey Kolima bost, abrotcaf gu 2130 km- is dis va bostxo vas 680 000 km<sup>2</sup>. Bato tir dem vageefa is varonefa mefta dem ontine vas 3000 m- ( Tcen mefta koe Tcerski jaka ), is dem Kolima valentefa azekapa lize bost kal Arktika welfa traspur.

Remi Stalinugal jontik lanzanik ko pemaxo ke Gulag bolc ke gola zo stakseyed. Bata rekola tuke berpot ke Varlam Calamov ( *Yona nega ke Kolima* ) tulon zo gruper numen Kolima trogarn di vanpiyir tan erbilok va Gulag.



Pemaxo is stolenikafo irubaxo koe Kolima



## Jadifa wira

Kolima, i glupafo arktikafo is vanartikindafo tawavo, dem lanansaf gaderopaf is tawavopaf kimeem, koe lugavafa letronefa coyunta ke Sibiria. Ezeuca is bumuca is boksafa lidawicka is olgapaf bliragropeem ton batakafo kusto vaon askid, i ton pilkovaxo. Sovietik va Kolima lodam betara gola ke Gulag tursia crakeyed : « Колыма значит смерть » ( Kolima va awalk sugdalar ) banugale zo gikaliyir. Karedjo grupeno koe kotafa TSSS soka kaliyir : « Kolima, Kolima, ey vecasa winka / san-toloy aksat fentugal, ark idulugal. »

Gola jontikedje tiyir ke rossiafo gindaxo, voxe kali toza ke XX-eafa decemda wan zo grupenseyer. Valevida bato afanano tawavo wetce « batakafe aytase cade » ik « patecta ke batakafe awalk » zo grupeyer, rossiaf vestasik iku tcabanesik iku stuvik va inafa kruldera al divrozayad. Toloya kira va tanealik dive gola al kevgiyid : boksafa lidawicka is tigrifa bumuca. Taneaf europik vestapayas nutiyir Jan Czerski polskik, i gaderopaf divblinik moni 189-e sanda.

Neken, Kolima va katcalafa aptaca atoer : i va kuluca gu moavafi vruni. Taneafi bak 1916 koe Srednekam krant ( kovoama ke Kolima bost ) zo kosmar. Bak 1928 bata kosmara gan ari vruni kene ara kovoa zo gruyer. Bak mila tanda taneafa sidopafa brinuga zo grustar. Bak 1929 pilkafa ikseltara gan rictaga zo pour, isen moavayestasik va intyona yestaks ika betafo dro pu Soyuzzoloto sokafa kawotafa ja gonoxaadad. Bak lardeaksat ke 1929, blodik ke brinuga va siskapas munesteks icde moavafa kuluca ke gola sanegad. Mergileem ke Soyuzzoloto ja zo laumasid ; neke wan tir betaf : 150 okol is 300 bedakol ikz-.



Kawotafa ja nope kobasa gracirapa mejer. Lidawickaf gropeem drikon pebur. Moavafa tokoda divkawodayana tir axapafa : 274 kg- bak 1930 az diretandon 153 kg-. Ba 13/10/1991 ta savera va kawoda is vegedura va vawa ke gola Dalstroy viley zo redur. Neken tawavo gan Politburo ke Moskva rontion wan zo gedir. Kobasikeem laumackar : bak teveaksat ke 1929, gakerafa fabdura dire tuadrar da lanzanik vas loa baroya flintafa tanda koe flint mea di zo dagid voxe gu poana kobara di zo eyoded nume ko kobaso pemaxo di zo arbured.

Radimi kosmara va kulafa kawotafa rotiruca, gola noalon toz zo malsaver. Stolenik ( rossiavon *lagernik* ) tid nelkafa xeka. Konak kunoy « volnik ke sane » faveyes gu levetiraf kobasikeem koe yona kawoda valente Sibira awalked, jontolon enide va kawotaf rob al malsaved isen tsunesik di xonuked.

Merovansanuca ke gola va jovlera va vawaf azed wale Vladivostok is Magadan widavapa ke Kolima nekir. Antafa rotisa gluya kle tir birafa, mal Vladivostok kal Magadan moltam ik Kamtcatka ik Ambatcik molt kene Arktika welfa. Vajtoteem ta remburera va stolenik bak lapira az moava bak dimlapira zo redur.

Taneaf gadesik va kobaso pemaxo ke Kolima bak 1932 zo koflir : Edvard Petrovitc Berzin blodapik ke GPU birgardial va rotieem ta tuvodara va gola dadir. Teni 1932, pata ke gola ixam tir dem 11000 daginik, keon 90 % ta vegedura va flintafe ik kawotafe ik remburerafe levedre zo vankolad. Gadenon gan Berzin, Kolima vanpir warzafa jowa ke Sovietafa Tanara. Kotafa skapa tir moe stolenikafa poana kobara. Moion, taneafa dadefa vawa ( 1034 km- ) van lenteka male Magadan kale Ambartcik zo taneaster. Kobaso pemaxo kene bata vawa zo vegedud isen warzafa kawoda nelkon moavafa toz zo saved.

### Magadan

Idja ke bata kaliafa vonera tiyir Magadan kelu ke Kolima. Bata onasa widama ton flintafo boniexo kalion voneweyer. Konak vuntoy stolenik vankolan gu kobaso pemaxo tandeon artlapiyid.

Kobara ke stolenik, afigasuteks  
ke Calamov tcilaxe ke Vologda



Мушкельная подача песков на промприбор конструкции Гостреста «Дальстрой». 1940-е.

Va sanelia ke Magadan is patectay tadleyed aze kali awalkera sye di kobayad : meka dimlapira tiyir abdiwiyisa. Batkane, Magadan tis wida dem anton 165 mona bak 1935 di vanpiyir widava dem 100 000 irubasik.

Sovietaf suteks, bro Magadan neva, va widava gu plinafo is witafo is bliso is loeke nuyafu xo pimtar. Mecoba bazer da inafa vonera va poana kobara va sovietaf rezgalenik is polskaf stolenik isu germanaf isu romaniafu isu latviafu isu lietuvafu isu siniafu is koreafu ikz- daner. Nope griaskira va kobas pemaxoeem remi 1950-<sup>e</sup> sanda, setikera va bat levetirikeem al griawir. Beka sovietafa savseluxaxa abicote al koafiyid, pune dameura va darekeugal re wan dilizer.

### Remburera va pemaxoik van Kolima

Poana kobara va axaf ramiruk kev sovietafa skapa co askiyir ede levedre turotisase va remburera va pemaxoik mal divoksexo kal malsavexo me co kruldeyer.



Tano jontiko moavaxo ke Kolima



*Транссибирская магистраль* kelot vanpiyir tela nelkafa liziba ta vanstara va pemaxoikeem kal recela kene sarva ; azon kal gedrafo pemaxo valente Sibiria zo rembureyed. Ronefo artexo ke kelot, i Vladivostok, tiyir mallapixo van Kolima. Neken, kabe sidafa liziba, birafa joya tiyir antaf mergil ta artlapira va krimta ke Kolima koo Nipona Bira isu Oxotsk. Toteem dikis va omava koe Vladivostok batdume zo reduyur ; wali 1932 is 1953 va mon celemoy poan kobasik rembureyer.

## **Tota dem levetirik**

Vajtoteem apton senuyun va pemaxoik ta antafa lapira rembureyer.

Tota, dum Djurma is Sovlatvia is Dalstroy is Dekabrist va konak decitoy pemaxoik koe tuksaxo rembureyed. Kotbata tota, xanton tisa vajtota, rorembureteson va cugaf ayaf vaj arinde zo senuyud. Ordafa tota tiyir Djurma. Dre kum inta kene dzeteem ke tuksaxo dem unja vas aluboya vwa zo renzayar. Kota vwa tiyir dem brid emudes va aluboy senyes ayik. Rundanyas pemaxoik ton taneon meem is taka vane lanixo taruteteson va belka gonanjeyer. Divcepexo tiyid dem vedila ( paratca ) rekolon tuvlardayana ko bira ; sina jontikviele trovga-weyed nume va cekaj ko tuksaxo mopleyed.

Moe batyona kaikvajayana tota, sinka kotviele tiyir dika. Banugale kotafa patecta zo vaceyer numen levetirik ironokon zo zanivayad. Moe tota, vace gitiyir lefa gu tela dafuna koe flint. Tadle ke vieleafa estura, mu kota lospa dem san-aluboy ayik, tiyir begki is pakta dem kunta is jumega dem lava. Rezgalexof emonjelk zo rewayar : « mekobas ayik va meka sinka rokar ».

Galaf gael rem ticefa xinta ke tuksaxo kostiyir. Soe tokoda ke kostis gael gitiyir dika. Ostik, xinteem is nelkaf tuvel tiyid budenaf kotviele tota va tawavofa bira ke Nipona koolapiyir.

## **Kobaso pemaxo**

Bataf olk tiyir kobaso pemaxo. Kolnayano koe bumpaxo ke taiga aala lize moavaf femint al zo kosmayad, pemaxo tiyir metcazafo is meesafo gu inkera. Zo envayar titison mivstapeso kiren

flira vas kobara ke pemaxoikeem benaykayar. Sin va pemaxo koton vegeduyud, gabeson is ilbodeson va inta is kolnason va wico. Koe taiga aala tozi trelaf idulugalaf cadim zo nyuyud. Inaf taneaf lag tiyir inkera va sulgafa istayaxa is intafo wico dem vistalexo mu stolenik is zanokeem, is dere divef xeeem mu susikeem is dirgasik. Ar blay ta vegeadura va taneakaf ugol ta savera va moava zo vankolayar nume va sid fenkuyur aze va kawotafa kobara bokayar. Divkawodara va moava moi artlapira ke yon ayik vere tozuweyer. Adja vamoe kolanixo ke pemaxo kaliyir : « Patecta va moava olegar ».

Tulon, icde kawoda yoltkirafa gu Priisk tigisa arte 400 ik 500 km- lente Magadan koe krant vanmiaie noldakirafo meftaxo :

*« Bak idulugal ke 1941, taneafa lospa dem polskaf stolenik ko pemaxo artlapiyir. Banlize va taneaf artlapisik kolnayas va pemaxo weti tolda trasiyid ; abicote wan tiyid blis. To nelkon flisik ke pemaxo va lokiewafe sinkavace isu vage kazawayad ise va lokiewaf bliragropeem pojayad kire va benelaf zanoxeem ravaldayad. Banugale, toloya monaja mu pemaxoik kobas koe kawoda wan tiyid dem abdarafa kepaita kum almuk ; wico ta burmotara men tiyir tenukeyena isen selaxe tiyir wicojo poke kolanixo ke pemaxo. Sulgafa istayaxa is sus rasek tiyid delon inkeyen isen lodontinafe susikafe sayakaxe va kot senuks noveyen gan goaspileem dadiyir. »*

## **Grustara va warzera**

Kota sugara ke bolk vas laumasira va warzera va moava niteyer. Gracara va nuva is witafo ugol jupayad da gadesik va warzesucaja gu laumasira va poan kobasikeem di lagwaeyed. Zinulayad da batyon taneakaf mergil va cugafa warzera ika vugafe tapile co ravaldayad. Nelkot tiyir da ja va int miv gostapeyer ise va ziliduksany mu soka gowarzeyer.

Konak grustaks ta kalstujera va warzera va moava kruldeyed. Gadesik ke tanbat tiyir Garanin. Rekola ke inafa boksafa gazara gu « *Garaninctcina* » dene gakerafa prostewa ke Kolima zo grupeyer. Mek azaf gadesik va warzaca tukiewasa va pemaxoikaf blira-



gropeem di lakoplekuyur. Yolt dum Vicnyovyetski ok Gakayev ok Drabkin wetce fikaf ristusik dure kaikdines is volvialas koe izva ke Kolima di zavzayad.

### **Ugalorafo pemaxo**

Pemaxo gomejijapayad. Vielu kawoda tiyir puskeyena, pune pemaxo sye zo jovleyer, isen dere pemaxoik volrodelanis. Arak van warzaf moavaf seg zo stayar lize va warzafo pemaxo di kolnayar ise va yona warzafa kawoda suxayar. Rawaks ke konakbato pemaxo re wan tid rowin.

### **Tokoda ke warzeyena moava**

Sedme uldinera ke Robert Conquest, moavafa warzera vas abic decitor arti taneafa tanda tiyir aze vas 400 ik 500 decitor tandeon co artfiyir edje ayikafa tazdara tiyid cuga. Re bata uldinera nutid slika numen ageltuca loon co tir vas saneaca.

### **Toleafa Tamavageja : tolgenira va TSSS**

Tolgenira va sovietafa tawavo gan Nazi Germana bak 1941 va rossiafa tazdarapa keve redjel taneon nekiyir, numen batcoba vebayar da sovietaf gadesik va intafa gaderopa tove poan kobasikeem di gotuolgayad : rabateson da intafa kobasa klita tiyid kimakirafa, va yona zolonafa betara joke stolenikeem gorayad. Kobasikeem turiaweson nope geja, tuvodaweyer : olgapafa askipera ke 1937-1942 tanda do zo jovleyed numen batcoba va tukiewara va bliragropeem koe kobaso pemaxo noveyer. Awalkereka illaumapayar. Bak konaka tanda, Sovietafa Tanara tiyir loeke gindesa tove stolenikeem.

### **Vrutara ke polskik**

Bata rekola ke izva ke Kolima gan yon polskik tunuyayan tuke mefavafa gaderopafa dotrakara wal Sovietafa Tanara is divbliyine polskafe bowere koe London zo divnediyir : bak 1941, moi tolgenira va Sovietafa Tanara gan Nazi Germana, polskikeem is sovietikeem kev mil Nazi volnik di tiyid numen vanpiyid vangluyanik. Bioga sugdayana koe London va tunuyara va kot polskik div flinteem is pemaxoeem askoayar. Rueza dinesa va davafa tunuyara gan sovietaf gakerabolk dile mekalion zo rewayad. Neken baxekap ke mobilisikeem gu polskafa ervolia zo

koplekuyur nume va Sovietafa Tanara di buluyur. Britik is amerikik va sinyona vrutara krafiansayad. Munesteks ke polskik ins zo afanayad ise wetce kevsovietafa galbedura zo atoeved.

### **Tena ke geja**

Do cenera va Germana bak 1945, tazdara keve redjel ten tiyid. Bata debala va warzafa kobasikafa klita kou patecta sure levgayana firviyir. Warzaf artlapisik tiyid germanaf gejastolenik isu niponaf is ukrainaf vedeyevik isu romaniaf is dere bewik ke polskafa acagisa ervolia pomayasa va Sovietafa Tanara. Kotbat ayik va xesteem iskeyen gan diref pemaxoik tukotrayad. Soe sinaf bliragropeem koe Kolima di tiyid olgapaf leon dam abdi geja. Jontiktan va tandafa gakera karleyed aze nope gaderoparura koe Sovietafa Tanara ko vo di rodimplapiyid.

### **Tena : artazukara va pemaxoeem ke Kolima**

Nope solelara va Dalstroy grustaks ke pemaxoeem bak 1957, sovietik va warzafa gaderopa va kobara koe Kolima vanikatcuyud. Beka stolenikafa sanelia va poana kobara wan di levgayar, pune moekote to gubef daginik tiyid. Gaderopaf daginik griawiyid. Nuyaf kobasik koe gola ixam kruldeyed voxen jontikar kuranik koe kotak ke Sovietafa Tanara di zo kselduyud. Jontik warzaf tanealik ko gola va int koinkeyed, reduson va yasa is kolnason va mona. Yik ko bata jowafa coyunta kan abduplekura va yofteksany is lokiewafa blireka zo vanimpayad. Artfira ke witafrubeugal va gola loeke turotcizanayar ise konakedje tutrigayar.

### **Rotuxadara va Kolima**

Sedme jontik rossiik is polskik is lietuvik is latviik, Kolima trogarn tir milsugdalaf gu baliexofa virnuca. Soe, geltruca ke bata xonukafa tameinda tove arak ke tamava jontikedje wan zo dameuyur ise zo mastuyur. Tulon, bak 1944 viele Wallace amerikaf ikataneagadesik ganeyen gan sovietafe bowere va gola worayar, pune kotcoba zo jupayar enide ageltafa kramuca ke Gulag bolk isu pemaxo wan zo palseyer, tulon gu Potyomkin widinda nediyina pu Ekaterina II gazik bak 1787 remi flikoyara koe Krimea.



## Ugalay

- 1928 - 1929 : moavakirafa tawova kene Kolima kuksa zo kikamayad aze gan soka zo malsaveyed.
- 13/11/1932 : redura va Dalstroy ja tigisa va aveg koe Magadan ta savera va kawotaf robeem, is vevedura va vawa is levedre, is turabara va coyuntaki ke Sumefa Roneka.
- 04/02/1932 : artlapira ke tota dem Edvard Berzin taneaf dirgasik va Dalstroy grustaks is sanoy taneaf stolenik. Edvard Berzin : zolonaf flibapik ke NKVD sovietaf gaderopaf ardial.
- 01/04/1932 : dirgara ta redura va Sevostlag pemaxobolk ta olegara ke Dalstroy grustaks
- 1932-1933 : fuxe 11 100 stolenik ke pemaxoeem ke Kolima, 10 % va divkawodara va moava kobaved voxen anton 25 % kaiki fentugal di moblid. Divkawodara va moava vas 500 kg-.
- 1933 : gorara ke Berzin kizes va kobara-prekseem tove stolenik, is tuovopas va savera num tuzijnamas va flintafa vertuma ta illaumasira va awalkereka.
- 01/01/1934 : nope jontika warzafa kametca dem gaderopaf stolenik is gubef stolenik, otacka ke stolenikeem ke Sevostlag tir vas 30 000. Berzin va askiperaja pu stolenik is inaf bliragropajeem is dandiskafa dakira va gakera is konakara rofavera rotplekusa va kalskura va azed ke Dalstroy boker.
- 1936 : divlaumara ke tegiso tawavo ke Dalstroy vas 700 000 km<sup>2</sup>.
- 1937 : stolenikafa ota tiyir vas 36 000 bak 1935. Bak 1937 re tir vas 70 000. Divkawodara va moava : vas 14 500 kg- bak 1935 az 51 500 kg- bak 1937.
- 3-aksat ke 1937 : Berzin va aelyastera is urbera

ke 200 trotski-evaf stolenik munester. Bantan gu xonuka di zo lanzayad aze zo zeltayad.

- 6-aksat ke 1937 : Stalin va gadera ke dirgasik va pemaxoeem ke Kolima malyo par, i va gadera co tisa tulwar-safa zijnarsafa tove stolnikeem.

- 12-aksat ke 1937 Berzin dirgasik is tcicesikeem

ko Moskva zo stakseyed aze zo sopeyed aze gu toidera zo korolayad nume ba 01/08/1938 zo zeltad.

- 17/01/1938 : rankera gan sutelasik ke Sovietskaya Kolima fela va torkevafa vertuma anamstegena gan Pavlov warzaf dirgasik koe pemaxoeem. Stalin va granafa klibura va stolenik gorayana gan Garanin NKVD okilik dene Sevostlag grustaks gu capraca is dandiskaca duvur.

- 04/03/1938 : nope gorara ke Pirdot dem ramisavikeem ke sane ke TSSS, levbenplekura va Dalstroy grustaks gu NKVD gaderopaf ardial zo arburer.

- 12-aksat ke 1938 : Ossip Mandelstam rossiaf ezlopik, lanzayan gu pemaxofa alubda, poke Vladivostok van Kolima awalker.

Stolenik koe kenibexo koe pemaxo ke Kolima, afigasuteks ke Calamov tcilaxe ke Vologda.



## Kotavaf Izvugalayak [-700 – -600 : Amerika]

*Sinka is Anameda — Irubara is Vevedura — Ckane is Gandura — Yamba is Miga*

### TOZA KE MATELAMIDURA

Exonera ke elupkafa wida getalte Lentefa Amerika va toza ke midura va anlizukafa ruxa dum sariala ik weda-tcakuda ik begart vadjeyer. Taneon, batcoba anton tiyir turasacama va tcabanen warzeks isu yestan, voxen tere bata ruxa di vanpiyid dalaf blotaf rob.



Taneafa ruxa miduyuna koe Amerika

### TUAZENTAYANA WIDAVA

Koe Monte Negro vagee Mexika tawamidusa meftavafa wida ton grustana widava banugale al vonewer, dem nuda azedon conyukayana is yona gedrafa sanegafa kolna. Xa vas ontinafa ravaliduga isu omafa zo kosmayad, i va xa bazesa va runtafa kruldera.

Mona, Monte Negro, Mexika





- 1938-1939 : bak fentugal, sedme merokevpatana gunestera ke savsaf stolenik, lo 40 000 korik awalkeyed ; xesta gan trenafa warzafa kametca zo ikaplekuyud ; stolenikafa ota batkane tiyr 90 700 bak 1-aksat ke 1938 az 138 200 arti tanoya tanda.
- 11/10/1939 : nope kaikfira va awalkereka ke stolenikeem is skuransa va talpeyaks va divkawodara va moava is aryon kawot, Pavlov is Garanin zo divpaklayad. Garanin gu xonuka nope toidera di zo lanzayar nume zo zeltayar. Artlapira va Magadan ke Yevgenya Ginzburg suterotik tiskitis va 18<sup>da</sup> koe pemaxo.
- 1939-1940 : 7600 ik 10 000 polskaf wideyik koe Kolima tigiyyid. Gu savsaf sovietaf stolenik zo solstayad aze ko sumefa taltefa kawoda ke Dalstroy zo stakseyed lize kobas gropeem tiyr olgapaf is iyelakiraf. Divkawodara va moava vas 62 decitor bak 1939 ; mialukafa divkawodara gu 45 decitor bak yona direfa tanda zo uldiner.
- 10/03/1941 : tawavo ke Dalstroy gu 2 266 000 km<sup>2</sup> ( 10 % ke welmacka ke TSSS banugale ) zo tugijayar, isen stolenikafa ota va 190 000 artfiyr.
- 1942-1944 : nope zvak ke remburera is dik ayaf rob is stara kev redjel va ki ke stolenikeem, ota va 84 700 bak 1-aksat ke 1944 titfiyr. Kobarugal kaiki 12 vieleaf bartiv zo dakiyir numen stolenikafa awalkereka leve fikafa vertuma mebetayana nekev malfira ke Pavlov laumayar.
- 10-aksat ke 1945 : pemaxo ta niponaf gejastolenik koe Magadan zo fenkuyur ise gu Dalstroy zo kavaniksantuyur. Ba tunuyara bak 9-aksat ke 1949, 3479 stolenik wan tigiyyid.

- 28/02/1948 : aptafo n°5 pemaxo levcano gu lodolgafta vertuma zo reduyur.
- 20/09/1949 : ta lokiewafa grustara is tuzegodara va kobara ke stolenikeem, elda ta Koef Arientem ke TSSS va Ristula va pemaxoeem ke Dalstroy reduyur.
- 1949-1952 : laumara ke stolenikafa ota mal 108 700 ba 01/01/1949 kal lewe 200 000 ba 01/01/1952 va bata warzafa grustara vadjer. To stolenikafe cuge remi kota izva ke Dalstroy is Kolima tiyir. Bliragropeem is kobaragropeem kapbure rekola ke geja me al betawed.
- 5-aksat ke 1952 : tena ke warzafa grustara va pemaxoeem ke Kolima, tenuyuna bak 1949. Sevostlag al zo sulayar numen Dalstroy banvielu tir idajaf ristula va Gulag pemaxoeem.
- 18/03/1953 : radimi awalkera ke Stalin, koinjera va warzaf gadesikeem va doevofo pako is soka. Nope kexi ke Eldaf Pirdot ke TSSS, Dalstroy grustaks gu elda ta malyerot ke TSSS zo vaniksantuyur.
- 9-aksat ke 1953 : toza ke granafa tunuyara va stolenik, is ke adre parmafa budera va pemaxoeem ke Kolima.



Rawaks ke dirgaxe koe Butugitcag pemaxo

Nuyafa ewava male internetxo :  
<https://commons.wikimedia.org>

Internetxo : Kotava : langue, littérature / ava, suteroteem

<https://kotava1837481.wordpress.com/2018/12/20/izvugalayak-700-600-amerika/>

#### NYOFARA VA MOAVA KOE PERUA

Lekeon koe Perua, moavaf toaz myelgason zo epuyud, is dere ingaxa kan ckane yoltkirafa gu malplatira ( tisa tufetinteara kakon tazeson va yanta ). Epuyun ton martig ke Chavín, bat pezak tir tana taneafa tula ke nyofara va moava koe Amerika.



Moavaf pezak, Perua

#### Furotafa Olmeka kuftama, La Venta, Mexika



Skunderi kum falfafa furota, Mexika

#### FUROTAXA

Va Olmeka xa koe kotafa Istefa Amerika trasit. Koe La Venta Olmeka kelu ( vagee Mexika ), wali -900 is -600 furotafa kuftama koe vask zo emanya-non belcetayad, ape wetce migaf firviks. Bati skunderi kum falfafa furota tazukon gu imboza ton matcon Olmeka martig.





Va jontika culimera fu jintú. Voxen va tokcoba rotaskí ? Kas golde jin kase ba abic aksat poki kogejara tiyí santoldaf ? Ape jinafa dilizesa skaltewera bak bat volgubef ugal tiyid ke inda gimesatolena ba mana klaa ; voxen larde mecoba lieke tuguazasa nekev awiaca sotir, to wetce sardik xuton gu stuva di golinulayá lize ayik co zo tokteyer. Me tí antaf. Isen setikeks ke jinyon palik icde ban ugal me titir milaf gu tel ke abdif korik. Kontan ixam sates va jin, gogestir dacoba geja tove jontik sardik tiyir : tilderugalafa balemnda.

Koe F- widava, kene Marne kuksa, sokeyev.

Gadikeem va aotcafa pusuca lodamon lanzayar. Pestapuve, sokoblise do min is va int guwiiskase, voneweyer lodame solelaweyer.

Sometí klokesik. Koncoba nutisa klok sedme artan, i sedme kontan loon folidjaf, sedme jin nutir ageltafa lion dam bluda sedme karvol, nekev trivafa biota. Neken biota krulder.

Batvielu biota empower, pune karvol sokimpavantar, kore to felisik empar ise va nuba volins vangaber.

Kali san-tolda mekon al fiaé, vaxe va sardya yoltkirafa gu Carmen, i gu tela staksemba gan jin kan lojotafe velikye va twa lize va jinafa rena koeon muxayá. Batinde roverenayá nume kakevetcadayá. Jinafa twa pu in ba riel abdi lanira ko bema zo deayar. Va antafa sardikya vektasa va jin kir parvuafa al solwiýí, isen ina do beryama ko bema gilaniyir, dum jin do beryeme. Enide bat toloy vrutasik di stivaweyed, va sintafa yerumara gestiyí, laninde. Acum va twa ke berye medjusutese ta Fauvette W-yama gu jinafa twa zokeyeyé. Pu berye va jinafa anamkalira diveyé, is va cinaf ervay uzeckes kev toloya milklaafa berikya is dem cugunaykapafa yoltega. Ve tiyí gabentaf wison da va riganya ke Carmen me al kunipayá viele vani miafizestura do gadikeem gigarumbes va jin is somebuzegas ko pula gin laniyí.

Moida palik ben bugi rundanyad, voxe jin tigus katice pulaxo is kurdanyes naritison kou brost va konaka karba ta volunt belira wetce taneik, bemagadesik kolaniyir. Ravesik ranyad. In va twa koe nuba giyir. Jinaf nimateem wayawer, karba lubeweyed aze treduyú, edje gadesik pu tavesik dokaliyir. Ixam, vayasik moe taneafa starka van jin kerukaf arte pulaxo rwodeyed kire va jinaf yolt tinteyed. Tere, gadesik va jin rozayar, aze gedelon pursatson vols nekison va rietaja ko kon bemik, bam sendayar kire va roliskafa twa dem san-toloyu bu al suteyé. Eruyur kase miv ant al suteyé aze djiayar da ko bazaxo di radimelaniyí. Me laniyiv. Koe kusk leve tcanda va jin riduyur. Torigiyir da rotplekura va sardikya ( inaf gadikeem va jinafa twa pu in al goleyer ) tiyir tegi astirbafi lion dam falura va tweluxok, numen batcoba va jinaf lidopaf stravok ve skaltepeyer. In dratceyer da va bat eluxok den jin fu stakseyer. Voseyé da meinde di askiyir. Xaayar voxe kaliyir da va twa di videyer ise ba taneafa tolaskira va jinafa linularaja mea ropalseter.



Bata aotcuca dem arouca is vazuca va intikeem xayeyer ise coeyer, milinde koe bema jinafa drika jupayar da gu ravesikany zo kruptheyé, i ageltafa vunguca.

Ko pulaxo gin kolaniyí. Tavesik beonaf va jin gu Don Juan yoltayar. Zo derbepeyé, moekote larde yolt ke grabom grupen gan jin vols kon palik zo ozwayar. Inafa « Va Don Juan kiavá » ewa isu dofugafa kicera va pulikeem mu jin di artazukayad. Rotir ixam al grupeyer da va rumeik ke omafa pula ta burera va twa pu « yikya » al vajgeyer, i pu « yikya » inde bemik kan olgaf avot gikalid. Yolt ke bat rumeik tiyir Staksasik ; volto nope yolt al narayá, neken bat yolt va jin al dirnuyur.

Ba tane bartiv, va gadesik al voseyé enide in va mecoba pu gadikye di kaliyir ; ba baleme braldehyé da va kotcoba fu pwadeyé. Mecoba va jin blagayar. Va bata welidara paton gu ronjuca co plekú. Grupeson da gadikye me di mibuegayar, sopron zo felbeyé kiren ine va jinafa sega fu grupeyer.

Nume welidayá, intotcon loplekuson da gadesik va belikafa tixoluca al abdiplekuyur ( dum pu milgik ). Gadikye djugrupeyer kase va bat renaberpot koton me al glotcayá. Ine den gadesik laniyir. Bak bata worara va coba fotisa liona katecton pulviyir.

— Va tokcoba ? ~ gadesik akoyen is argepen kaliyir. ~ In va batcoba al pwader ? Al voseyer da stivawé, kalison da edeme gan rin co zo aytar.

Bata rotuxadara ke gadesik va ine skaleyér ; va jinafa ayikyefa grijuca ware webeyer. Va karolara ke palikeem is miabuditara ke tavesik vere wayá. Gadesik va vidjera palseyer. I kimtik va coba ixam jinon grupena me grupeyer : gadye, lemisteyene gan inafa linulara, al kiblayar da va bemafa tanda di tenukeyé aze dimon di zo nariyí. Batcoba bam tiyir tozi teveaksat. Gadya kuraniyir da jinaf waks iku gablexa me di zo turestayad, batdume keyer enide va trakuray moi xolera di kaliyir. Ba bat viel, tuke memalyaca ke gadesik gojon kivas va keskeem ke dilintaf rotuxadaks, antaf ke pula va moavafa sona mbi zilukeyé, i sona riwena gan seotasik va donaf waks. To patavaraja : bema va toloy lokiewaf vayasik drasuyur, kiren gadikye ke seotasik va donaf waks va nazbeik di tiolteyer.

Yon vayasik dum cin va vigrokasik ta jekura va yonar zanudayad.

Gadya malyedayar da tiyí jotarsaf ta vayara dene Henri-IV olda. Koe inafa swava, batcoba sugdalayar : ta koyara kan impadimak. Acum dene mona toldon zavzagiyí ise ant kobayá.

Va kimiskafa daava pu int abdiplekuyú, kire lajuraplekuson va kobara bad balemoy bartiv voldum tolda ke jinyon savsaf milbemik, tiyí nuyaf bak loon afizacku. Kene Marne kuksa ant gibegozayá, i kene Marne en tisa cinafa kuksa eke pulvison va Seine, berikya kaliyid va « ara Marne kuksa ». Va tota ke gadye dace rundanyayá, nekev inafa poura ; voxe me detceyé ise me welidayá da jinafa vudera me tiyir tela ke volvegera vols vuda. Gibeliyí, ranyes koe bata tota. Bak 1913 is 1914 va tol-decemoya neva koeon al belí. I me va nuve bata nevaja vols ape tela lokiewafa neva, icle sedme riwedara lodam swava. Acum vamoion, ba klaa edje sardik va olkoy ke Raltadukaf Nevak givligur, pune va sinafa rumeafa mempera toz grivuteyé, beka batugale vaon vol djubeliyí.

Troy ke batyona zexara goatesa gu kobara tiyir da batcoba va varafa tanda gu rolaf tilderugal artazukayar. Acum, jinafa vieleafa kobara tiyir abiccoba, voxe larde leedje dam artan kobayá ise



bak tilderugal ostik kobayá, pune bata abiccoba tiyir uxadaf tiracuk viden remi blira arte ault beka tce va tanoy aksat dem milka co abdualbayar.

Ageltaf tilderugal vanfiyir voxen trumansayá larde tove jn tiyir mila dilizera. Karvol va bluda valeve biota wan disukeyer. Voxen geja sokiyr.Va biota empayar. Felisik va arcoba di goviunsuyud numen karvol wauneyer.

Ae, kottan koe Franca wauneyer. Rumeik, dem gablesa neva leve ma, lente finta tandeweyed. Vayasikaj va grivodjura va yasa impavantayad.

Kotvielon vani sielestura, ko J- golda arte toloye decitmetre denu cin laniyiv, witison va sayakaf impadimak pokolapis. Va tcalarna divbureyev aze pu sayakik kalkabuyud. Awemkirikya va keravor ko menk gimayad ise va jontik inoc mo etol vilunden gu imwa malpleyed. Bata varafa belca va tcateyafa setikera den jin isker. Isen meviele manote vor zo mogrebeyer isen imwa zo vanmimayad. Va dilkeem ke mona gu nilt udayav.

Fure ko J- mea laniyiv. Jinaf berikeem va geja toz sateyer, krupteyer da ina tiyir jijarsasa. Va biradom pu sin pouyur. Gaveon gimodeyes, berik va fela ba teve bartiv re golusteyed. Kimtafa zexara ! Voxen moni tol-sane ke anyusteaksat, bat jotaf rostazik gin pokoled. Terektason va gadye pulvise va mallapira bene azega zavzagid lodame bulud lize milgik vangaved. Ape meka liziba mea zo rodadir.Kan tolkrafol ilon fu gokoyat. Berye va beryama kranded. Xakola ke inaf krafoleem tir vas lowe balem-sanoye decemeametre : « Va rin antaf moe vawa isketev. » Berya buwejer. Voxen mana seramuca ta ernigera va tolkrafol ! Mea vunguca. Draged da va tel jinaf fu dimempad. Grupeteson va warzot, mali vanafiz ranyad. Edje kottel destar, va vrati ke bata gugafamuca tere kosmá : koyara kan tolkrafol ! kal bira ! is bira sumefa loon dam gilton isu listafa. Lokalion lapitison, va Paris co anteyayad. Coba tueaftasa va Europa al vanpiyir sinafa tanafa pokolera.

Kas ketsuca ke rumeik tir amidafa gu tela minafa ? Idulugalon koe tawaday, va muvara girotapsat, voxen midusik imaxud.

Sokira ke dubist voldo darefa wica sotir riaca. Osterafa bilmara, xeftoara ke Caillaud arpeo va merokagaellan alpoz zeitafa gu testuca anamgimayar. Acum jinafa ageltafa setikera va geja tir abdi geja.

Batinde :

Berye is jin va tan vegungik yoltkiraf gu Maréchaud balgeyev, i va vertovik, i va klodik dem batafaf is djimotkiraf lukastam, i va dotapirdotik. Kottan gu Maréchaud gadikany dayoltayar. Beka keveon sokeyev, vol rovekiavayav numen in riyomepeyer jontikeke beomason va cin moe vawa lanviele domuyur aze kaliyir : « Ex kle ! va dotapirdotik me kiavac ? » Yateyev.Mali bata eskarnaca, plabura zo kabudayar. Voxen va tokcoba dotapirdotik kev cin rotaskiyir ? Koulanison va bema isu kolanison, berye va inafi mamlesiki impayad, pirtapon kiren vakol co tis ke jinafa klaa tiyir merokivan.

Darekeon. Bak dareviel ke 14/07/1914, lanison van jinyone berikye, evodara tir gijafa viele va tari kabdue polku ke Maréchaud wí. Konaka basgamayana frumba va garia arte matela palsejed. Mali tole kielbartiv, inafa kwikya vanpiyisa oviskafa moe kepaita al gelber ise voldjuprotitlanir. Ixam Maréchaud yasa, kovudana gan bilita, va telvungeem al buder maninde



folve ke bat oviskik moe kepaita gan nutisa jovlenuca ke mona zo laumar. Korik iegad, exuked da felisik va mecoba ta giwara va bat kimitik sopud. Inya moe mikiya lopcer, beka meinde nutir izakotik. Batlize wan djuvavzagí, voxen cinaf kwik stakseyen gan gadya artlanir azen ta kobara gomallanid. Edeme va jora al co zelá. Ton awalk koe gloga mallaní, ise va Lorik bliké enide kwikya moe kepaita wan tigitir viele va gadye ko golda aneyatá.

Wan tigr, voxen riaf lanisik mal Paris ta sielestura az tcokera va sirta ampud. Acum va tanoy ewaraf verast puon anton kaxaad.

Ostik, batvieli, tove kwikya, batcoba anton tir loleon sanegafa abdzirsera. Ina ba siel tozuweter, kare favuca, dem afifa gumurda tazukasa va ageltucaf stirk. Tel ke ikpa is tel ke atela belcon tid, kiren Maréchaud wetce strabik va koafira me al rovenyuger beka nigracer. Puda ke battanya va tacuke ke bata mona ke gomil webeper, i ke ayik dem ezas usuk gozas moe kepaita dum niltkirafa azeba : i puda meayafa is laridafa is pibafa eke va wilalma askir.

Kevfirdesik koe dotama tid « kuranik », va arcoba vols fird afizcekon giviunsud. To vrodbildesik ok lupasik ok ludotiasik tid aze vani kobara artlapid aze fu artfirdad ede fird miv me al grirunkawer. Mali tixara, cinaf kevfirdesik va teca bulafa ervolita fiesa ik tiusa ik mielon enintesa ostik al tazukad. Bat budik tere artlanid aze va tari ludzed.

Ayikya abdulnir. To kurenik ke dotapirdotik kevelaf gu Maréchaud tir ise mali konaka wexa va oviskikya lorason forendar. Pu redakik juiker : « Lagal da va ina zijnon askipel !! Bata kimitikyama en tir volkalafa, koe bata mona lize dun zo alier. Ison, ede kivara va divkobara num tira a rundak va mana tegira jupad, pune kalil da va ina den jin di kokobatá !! Va inafa kuba jontolatá. »

Bata lorasa sodura va rotakafa keska den tari askir. Weltikya argar. Tari va gralomera anton trakur. Kevfirdesik, oton gu teva, va polku urped, va mona ivamudad, kotliz ticumason. Voxen vielu tan mo kepaita awir, pune walzeteson va kosik tari toz taspugar, dum rumeik pu Guignol.

— Stivawec, en !! ~ weltikya iegar nume va « To tan vanlanir ! To tan vanlanir ! » eviegara lular.

Ba batyona iegara, oviskya va mikiya vangir aze va tana mo atsa ke kevfirdesik artteriges va verol kalmimar. Tel aluboy ar vere titlanid.

Edje mukerma is embela is kapaliez moe Dotaxe viga arubad kire va dik anelik wid, remi miel edje kazawaks co gotir wemtackaf, tcoketeson va tcabanera laof sotik va rebava urped aze mo preima tanded. Oviskya va konakcoba vulkutuna kalir, trobindason kexapon dum viele ovesa lanera pu puda sozilir ise kottan rokler. Sotik abdialbas va bata disukexa gu kapa, va puve soe djupendad. Acum, skotceson kivason va gralomera va oviskya bak intafa gracera, ta etsa moe intokol govovulted. Konakar loproyaf, rundanyayas moe gama ke frumba dum ta ingoy ke Vincennes, va tcafeiy ik tuivuro anton anteyad.

**Oretlik koe alto**, ke Raymond Radiguet ( 1<sup>sa</sup>afa zixa , diza titisa koe diref otuk )

Oretlik koe alto : berpot (1923) ke Raymond Radiguet francaf suterotik  
 Xanto : *Le Diable au corps* francavon, kalkotavayano gan Laurent Lermigny, 2017.  
 Dotay : Kotavaxak dem Suterot.

Robelin banliz : <https://fr.scribd.com/document/358060704/Oretlik-koe-Alto-ke-Raymond-Radiguet>





**Isaak Levitan ( 1860-1900 ) ~ Rossiaf lingesik**

Isaak Ilitc Levitan ( rossiavon *Иса́ак Ильи́ч Левита́н* ) tiyir sposaf rossiaf lingesik, i tan felisik va patectoyafa lingeropa is redusik va oxi vas « aflicaf patectoy »..

### Rumeugal

Levitan koe yoltiskaf shtetl widel poke Wirballen jowafa widava ( re Kybartai koe Lietuva ) dene yudafa gruadikafa vox wawafa yasa ba 18/08/1860 kobliir. Gadikye tiyir avatavesik isen Isaak koe mona loedje raver. Tici 1870-e sanda, yasa ko Moskva divsoker. Banlize nekev lorotafa erbafa debala, gadikeem va abditcafa skeura ke nazbeye va yamba tukuvad. Isaak djuvanpir yambik nume va Yambafa Reila ta yamba is balumara is vegeuropa ke Moskva nobar. Bak 1875 gadikya awalker azen arti tolda gadikye nope riftakola dere mulufter.

### Yambafa toza

Levitan ton sutuca is wawuca va jotugal al tiskir. Arti ugalam divreilanon zo aloyar kire va vayaso dro me al rododer, voxen konak nik gu adrafa erba al pakudayad numen deneon ware roraver. Kadimion tavesikaf pirdot ke reila gorar da in faston di rovayar ise nope fitcap is taneafa kiewatca va filavam dace mbi ziluker. Mililanon den pula vayasa va tuwavafa opa gadena gan Vasili Perov zo arburer. Perov tir tan zabdusik va Avlemodikaf Seltom ( rijay dem yambik tazukayan bak 1870 ) is burkaf yambik isu tavesik. Kaikion Levitan gan Aleksey Sakrasov katcalayas va inaf fitc num erbon pomas mbi taver. Bak 1877 alubeafa avlemodafa yambafa wonara ko Moskva artnir aze koe reila zo atoer. Toloy lingeaks ke Levitan zo divaykad : Sielcek is Awaltaf afizcek, imwugal. Zo emudenyed, soe reilaf pirdot va diema me ziluker voxe va dob firvir, i va dob askis da Levitan va yamba di ronotaver.



Bak santoleaksat ke 1879, toleafa vayasikafa wonara zo grustar lize Levitan va Muvugalaf afizcek trutca atoer. Grabom gan Pavel Tretyakov zabdusik va milyoltafe ginsaxe zo luster. Taneatomon fitc ke Levitan volunt zo kagruver.

### Kagrupen lingesik

Bak kot idulugal wali 1880 is 1884, in va tuwava ke vema ke Ostankino poke Moskva pimtar. Kaikion rokoyatason ko Krima, va kaleynafa zikexa zovdar. Anton to isti 1880-e sanda nope ubzesa kobara is wetarapa, inafa erbafa debala tukiewawer. Wori aeles rumeugal is spuesa blira va keska gu inafa galera ton tittisa takrakola al nekid. Koyara koe Krima va lana tukiewara jupar. Radimi dimlapira, Levitan va ilkafa wonara dem tev-sanoya patectoyafa trutca grustar.

Bak 1887 Levitan va klokara tukramar, lakison mo domega ke Volga bost. [...]



Varaf teliz tigis koe Kotava Xadola dene Wikipedia. ~ Banliz :[https://avk.wikipedia.org/wiki/Isaak\\_Levitan](https://avk.wikipedia.org/wiki/Isaak_Levitan)



## Recela 9 : Odawara

Recela 9 : Odawara tir saneafa gweta ke sposaf gwetak vergumveltkiraf gu 53 recela ke Tōkaidō vawa ( Tōkaidō Gojūsan-tsugi no uchi ), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo ( re Tokyo ) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.


Hiroshige va varaf gwetak dem 53 recela ke zalor zovdayar. Bata gweta ( *Ukiyo-e* tazuk) tir lumkirafa gu 37 × 25 cm- ( ton Oban breviz ). Tir lerdeafa ke enk ise va greelt koe Odawara kaatoer.

### Greelt ke Odawara


Recela ke Odawara-juku koe Odawara widava wale Hakone meftaxo is Sagami ceda kene Sakawa kuksa zo exoneyer lize zolonafe lamonepe tigiyr.

Folkafe lamone ke Odawara tiyir pilkot ke gijarotifa Hōjō staba bak Sengoku rekola nume baron ( 1561 az 1569 az 1590 ) zo deblameyer ise zo vangiyir.

Gweta ke Hiroshige va nakila remlanisa va klape ke Sakawa kuksa nedir. Lebamaf ebaf buresik va koyasik is tukseem kan epitaksid domega-domegon rembured.



Xantofa piskura . 1833-1834 gan Hōeidō



Piskura . Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingsik  
( 1797-1858 )

Varaf teliz tigis koe Kotava Xadola dene Wikipedia.

~ Banliz [https://avk.wikipedia.org/wiki/Recela\\_9\\_-\\_Odawara\\_\(gweta\)](https://avk.wikipedia.org/wiki/Recela_9_-_Odawara_(gweta))





# TAMAVA IS TAWAVOPA


## Tasos ewala

*Ellasafa ewala koe Mediterranea bira*  
*Lenteon, 13 770 ir- moe 398 km<sup>2</sup>.*

## Tawavopa

Tasos grocelon ice Kavala pargalu tigrir. Welmoton ice 398 km<sup>2</sup> is dem anamkola vas 80 km-, tir tela logijafa ewala valente Aigaio bira. Lentaltugeronafa Ipsarion jaka dem aluboy ontinuk vas loon 1000 m- va ewala gu toloy amidapaf pak solparsar : lentroneon bridkirafe lae lize exulera tir medrikafa isen azeka tid vwepafa, isen getalteon krimtafa loglupafa azeka drikon rovansana tid.

Levesid ke ewala dalon tir kum lukoptakusaf igum is trilna manton saveyena remi Savsugal. Moavafi vruni isu lutafi isu azilafi isu dilgavadigafi mali ban ugal dun zo saved.



Tasos ewala tir besanafa gu aala : persa is uxa is pailta is duela is cercis aal is wansa is uvoyafa ruxa kire va uma lava tukuvana gan zakodack sodir ( mediterraneafa lidawicka ton balkanafa niedara ). Bak Savsugal, inta tiyir tan dalaf rob ke ewala larde aalxo tiyid riafo koe Ellasa. Koe krimtafa azeka, kruba zo midur. Centaxo lekeon warzeyeso va divburepen vartaf vor al riwe griawid.

## Koyara koe Tasos

Anamelapira va Tasos, i va listafa tuwavafa nek megrupena ewala.

Ellasa tir kotrafa gu ilamkafa ewala voxen meka tir lieke tanafa is megrupena dam Tasos. Tigisa valente Ellasa talte Tesaloniki, bat mukot ke koyara divfisa va gubeaca va diliodaf is zexas tilderugal nover. Tasos tir fuda icde moavayafa piluda lidam soporaf ruxeem lidem zultaf patectoy. Isen inafa izva tir kulafa ise sinka sutkafa ise irubasikeem luntaf.

## Tokdume Tasos tir sposaf ?

Tasos dalon tir sposaf gu warzera va trilna is tiskara ko varafa tamava. Inafa trilninda tir tuwavinda lobatakafa ke tamava num tcazapafa. Valey trilna, Tasos dere tir vartaf gu decitdafo krubexo. Sedme ewafa prostewa is yona izvafa xantaza, weti 3000 Phoinikes saneik va taneafo krubexo weti 3000 tanda banlize taplekuyud.



Ipsarion jaka solparsasa va ewala ton toloy amidapaf pak

Isen Thasos dere sposaf gu sutkaf lonadunol. Abdida koyutarula vanpiyir taneafa zilidusa klita ke ewala, pune lof irubasik ta onara kobayad. Va intyona tota digiyid oke mu zolonafu sistu kobayad. Batugale kore abic onasik wan tid, pune iewaf kabay kotlize koe ewala drikon zo roseotar.

## Kiewacapa koe Tasos : anamolapira va ewala kan direm

Anamolapira va ewala kan direm tir moo tana lodirpafa vawa ke Ellasa. Vawa abrotcafa vas 100 km- va kota nelkafa wida ke krimta koolapir ise va akoydasa wira va Aigeio bira firvir.



Stason, va piluda is sumefo xo arkane medrikon rofansano rovokosmat. Tulon tan greelt rotir worara va Mikaelos tucpastaxe tigise tice kiria vamoe lavok. Zultafa wira va Aigeio bira is tanafa vegeeuropo ke tucpastaxe va kot worasik tis alkafamaf ok me skebutud.

Ar sanef greelt rotir Aliko rawopaxo vagee ewala. Aliko tiyir dalafo maltioltexo va trilna remi Savsugal. Koe rawaks ke raporxo evlon gu XII<sup>-eafa</sup> decemda AGJ- ware rogozat. Ta lofa grupera icde kulafa izva ke ewala, va rawopafe tcilaxe ke Limenas roworat lize va xa ke Lekeraporugal mafelat.

Ede va tuwavafa listuca loon dam izva abduablat, pune stragat da anamolapira va ewala dere poko Giola tir, i poko tuwavafa drimula ke Tasos. Ina tir ivamufa uzdakama konina gan lavok lize stinon rovopujet.

### **Moe lokiewafa piluda ke ewala va int zexat !!**

Viele anamolapit, pune va akoydasa is gedrafa piluda tire katcalat. Kotviele kona rietavafa piluda mu kottan krulder. Ont bumafa drifa piluda dum Tripiti, ok tapegafa piluda dem zazda dum Skala, ok gulafa bixefa piluda dum Paradise. Ugal tiskin kene lavok titir merovulkun.

Ede va kona piluda bagaliafa gu piuteliwa tisa wavdafa gu trasira arlize koe Ellasa aneyat, pune Marble piluda titir tela. Tigisa poke Limenas widot, i bata klokafa piluda tir bixeiskafa vox dem batakafe yeme. Tuke sine is pokeon tigisi trilnaki, lavok banlize dun tir ton divepatecton frolgukaf. Neken vexala dem piluda riwesa va worara tir abrotcafa isen jontika aulafa piludama kotlize aname ewala tid.

### **Va meftava ke Tasos vestat**

Kore va varafa safta ta worara va piludeem ke Tasos mantan rotiskit, pune jontikaro xo wan zo roworad. Ta betara va zikexa, mal bira kal meftava, fala tir da Tasos tir tana lomeftavafa ewala ke Ellasa.


Cugo izvafo inkexo tice mefta ok vatice datca tigiyyid. Kaiki griawira ke tcorduca, irubasik va krimta adre titlaniyyid. Bandume rulda ke jontika wida tir ton tola : ticeon xantafa wida is titeon warzafa wida yoltkirafa gu « Skala » ( ellasavon fogelom ).




Wiks va Limenas widot ke ewala



Tana jontika vurja ke ewala



Giola uzdakama



Nardama iste ewala



Tulon : koe meftava Sotiros do Skala Sotiros kene bira. Batdume wida koe meftava tir loon prostewafa dem kulafa izva loon dam kona krimtafa wida. Batcoba tir lopekufa lazava ta narara va vawa is kosmara va istexo ke Tasos.

Kal Kastro meftavafa wida stat aze va lamone is genovafa vegeduropa mafelat. Oke kene yona sanoya kuksama wale prostewaf moneem ke Panagia gozat lize lane lokiewafe voltaxe ke Tasos tigid. Isen tode tanoya meftavafa wida zo gonarar, pune co tir Teologos. Malellasavara va yolt tir « ewa ke lorik » numen tigison gildat dume man yolt zo ziliyir. Tuwavafa listuca ke gola is raporda ton makedoniaf martig tid tanafa koe ewala. Isen sposafa narda ke Teologos arti abica wexa mal istefa viga oxam tigr.

## Izva

### Wid ke savsavafe sare


Ewala mali Gelkeraporugal zo kereleyer, aname arula lize varka zo maltiolteyer. Irubaxo ke lyekotugal dere zo katrasiyid voxen izva ke ewala geltron zo gruper vielu moni 680 AGJ-gan ellasik vey Paros stan gan Telesikles



Zovdom va savsavaf wid



Xim ke savsavafa rebavega ke wid



Krubaxo, prostewafa kulaca ke ewala

gadikye ke Arxiloxos ezlopik kare katcilaca ke Delfoi zo boniayar.

Fure warzaf wid va turestaxo mo lentefa tadava divatceyer, i mo vema kulafa gu jontiki kawotafi vruni ke moava is dilgava. Moavafi vruni isu dilgavafi koe vema ke Neapolis is Kavala is Lekane fluvor tigiyyid. Bata kawoda wale talteon Strumon bost isu roneon Nestos tiyyid kulapafa nume tutrigayad : moni 500 AGJ-, wid tiyir kulaf is gijarotif ise va toteemap ta kazara is geja dadiyir ise va anambe al vegeduyur.

Bal farsellasaf gejatam, irubasikeem ke Tasos va molikera va Darios gazik bak 492 AGJ-tatceyer aze bak 480 AGJ- va estu mu Xerxes is inafa ervolia grustayar, i va estu tapileyesu vas itayapa lofa gu tandear ziliduks ke wid sedme Erodotos.

### Pulukafe sare

Radimi farsafa surtera, vanbureson va lopekura ke intaf toteem, Tasos va Delos gluyista bak 477 AGJ- yoteyer. Griawira ke farsafa gijarotiuca moe Europa tadava jupayar da in va turestara di ronodivatceyer. Voxen isti 460-e sanda, irubasikeem ke Tasos va dulap ke Atina koe gola klantayar, i va tulon dulap icde kawotafi vruni ke Pangeia mefta. Walzvax icde kazas molt koe Trakia is kawoda banlize savena gan cosik ke Tasos zo divrozad. Bak 465 AGJ-Tasos va Delos gluyista buluyur nume gan Atina vere zo dilfuyur. Atina moe bira ceneyer aze mosidayar numaze dirganon gan Kimon, va wid deblameyer. Radimida va Sparta giopon al



greledayar, pune arti tolda bak 463 AGJ- Tasos goduntuyur.

Zauzera tiyir pofa : sanelia ke Tasos va rebavegeem gonovilayar ise va toteem gobildeyer ise va kota dinena erba godafuyur ise tori direkeugal mbi goculiekayar ise va tadava is kawodeem gojovleyer. Numen wid gu intyona dalafa zilidusa klita ( ziliduks ke tadavafa kawoda is grastu exonenu tove tadavafa kazara ) di zo zelayar ise gu ixalarapa ( dimdodera remi tolsanda va oyak ke geja pu Atina is culiekap pu gluyista ) zo sedeyer.

Bata askipera va skapa ke Tasos sanalubdon troyepeyer nume stegeyer da wid va warzafa abdinarira pu wideyikeem di koaykayar : i va koaykaxa va miduraf warzeks ke cosxo, trabe va vartafo centaxo ke ewala. Koplekura va mana koayka va erbafa faxuca ke wid icde sinaf vebareem remstayar kiren ellasaf savsavaf wid va mancoba anton bocoyon gividuyud milinde tula ke Mende wid ozwayana gan Aristoteles bazecker.


### Hellenismus sare azu Roma

Nekev felira ke Sparta, Tasos va litoka ke Atina mali 389 AGJ- gin kofiyir aze va toleafa atinafa abdigalda bak 375 AGJ- pakeyer. Wid banugale wan tir trigackaf isen inafa kazasa ayewara tir zolonafa, nekev tugijarotiwera ke Makedonia. To bak oxam 202 AGJ- Filipos V gazik ke Makedonia va wid koilkar voxen inafa surtera gan Roma arti oxam barda va Tasos is ellasikeem gire tunuyar.

Banvielu Tasos va sagaf vangluyanik ke romafe sokasane dun tadleyer nume vanpiyir nelkafa troskada ke gola remi II<sup>-eafa</sup> ik I<sup>-eafa</sup> decemda AGJ- inde amuzera va tal ke Tasos banugale bazecker. Grewatson gu bata saguca bal tulon deblamera ke Mitridates gazik, koka ke Roma pu Tasos va inaf tawavoeem moe tadava dimziliyir. Kaiki lana aytcura bal exuratum bak tena ke sokasane, wid va savsaf gogoleem bal gazugal ke Augustus katrasiyir aze kali III<sup>-eafa</sup> decemda gutrigaweyer.

### Rob ke savsavaf wid

Kulaca ke ewala tiyid jontika. Va lana triguca pu Tasos irubasik ravaldayad voxen va gojera ke cos felis va ellasafa tamava dere nekiyid. Sedme Erodotos, savera va moavaxo is dilgavafo digxo va moava vas 160 kg- tandeon warzeyer. Moavaxo tite widventa gan rawopik zo kosmayar. Lutafi vruni isu dilgavafi ta erbafa warzera poke taltefa krimta zo saveyed. Aala dere tiyir robap ta rentanyofara vrebafa gu totafa vegedura. Trilnaxopo warzeso va batakafa trilna ta balumara is vegedura kali witugal dere zo saveyed.



Savsafa widventa isu wid



Savsafa trilnaxo ke Alik



Dilgavafa tetradraxma talolk kaatoes va Dionisos





# Rostela

				
Afede	Vraz	Coluba	Rezolde	Xote
				
Urt	Nyul	Bloy	Kunte	Kuntot
				
Gemmifera kunte	Italica kunte	Romanesco kunte	Sarialeda	Logaste
				
Negruye	Ustov	Karku	Fiku	Finyegede
				
Rizoke	Grence	Grijda	Rizo	Bim
				
Irk	Nyorkue	Biolma	Fleoca	Krube
				
Puxime	Urtey	Reze	Biedje	Biedjatoa
				
Utsarka	Runjig	Wikaye	Begartom	Vumbuk

Batcoba tir ewavak wion atoes va 40 rostela ik rostelinda yavon malestuna koe Franca is taltefa Europa. Va sina tuwial ise va yolt namil !!

*Sangiskafa ewava amuzena dene Internet gort.*



## Dingelt, kan 10 bibe



1. Ke tok lexasikitum dingelt tir ?
2. Kum tok ugot celyom ke dingelt tir ?
3. Toka pakava ke dingelt va gira va wazdel nover ?
4. Kas lexatamaca kan dingelt zo roskur ?
5. Yartesitison va wazdel, toka dorora kev yinaxeem ke celyom zo gorewar ?
6. Tok yolt ke xo ta itowa tir ?
7. Tok yolt ke mi wazdel ( an vucaf mamolk ) tir ?
8. Tok yolt ke ckane kurtase va wazdel kan gelt tir ?
9. Toka nuba ( ke ronenubadalik ) kan celyom skur tir ?
10. Kas taltenubadalaf dingeltusik krulder ?

## Yona eba ke lexa

**Kitcovokilik**

Va lexisikeem gader : kitcova ok pulukafa lexa oku jazz ok joralexa.

**Lexusik**

Do lexisiktum ok kitcova dolpur oke ant. Jontikviele lexisik dere tid tavesik va lexa.

**Dankasik**

Dankar ise gidolpur, jontikviele dositanon gan yon lexisik. Dere rotir tavesik va dank.

**Lexatavesik**

Tir stinaf is dobkiraf gu tavera dene lexabema ik reila ik olda.

**Dolantisik**

Va klawa dolantir : va wazdel atcer oke dmatcer enide koto uzadjo ke klawa va mamolkany di dear.

**Kingiasik**

Va lexasiki dem pragan ok kurtan wazdel iar ise dimempar : dingelt is *alto* is dingeltok is forta is tasila is kinga ikz-.

**Gedisik va limega**

Gubeon dene limegafu sistu, fli ke gedisik tir tcalutera va yambik aze dositar enide bantan va limega komamar aze kodoler. Pirdason va yambik, do yambaf gadesik gikobar.

**Mamgedisik**

Koe dolpaxe ok disukexaxe, va ugoleem gedir ise dolantir enide mam di tir cugeke kiewaf tove tookenikeem. Koe onya rokovertesa va lexa dere rokobar.





## TELIZ

2<sup>e</sup> bu : Kolima, Gulag stolexo  
6<sup>e</sup> bu : Kotavaf Izvugalayak  
8<sup>e</sup> bu : Oretlik koe alto, berpot  
12<sup>e</sup> bu : Isaak Levitan, lingsik  
13<sup>e</sup> bu : Recela 9 : Odawara  
14<sup>e</sup> bu : Tasos ewala  
18<sup>e</sup> bu : Kotavexa : rostela  
19<sup>e</sup> bu : Yona eba ke lexa  
20<sup>e</sup> bu : Kuda ke Aisopos

## Kotavusa virda

Virda kotavon sanelayana, nuyon is faston  
romalvajana is rorubiana is rotamzilina.  
Ickriluyun rokeem. PAG / DE.  
Internetxo : [www.europalingua.eu/KotavusaVirda](http://www.europalingua.eu/KotavusaVirda)  
Bu : [www.europalingua.eu/KotavusaVirda/11-e\\_otuk\\_09-2023](http://www.europalingua.eu/KotavusaVirda/11-e_otuk_09-2023)

Sanegara : Lerdeaksat ke 2023. 11<sup>e</sup> otuk.

Yunkeks is ewava : ewaveem abugaf gu roka ok  
nuyon rotamuzen ok rictayan gan digisik.

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

5

Loma  
PERAKEDUNOL

FR  
tortue

## Imboza



Imboza sotir perakedunol dem lona.  
Jontika katca krulded. Lanyona imbozinda  
sotid sidaf, aryona lavadafa, is aryona  
birafa. Lana imboza guazapon ( > 100 t- )  
roblid.

perake - negova - tromiz - zoxa - imboza - salma

## Vakol fineyes va idatcol

Idatcol pu vakol kalir : « Tokdume, larde til kotinde oltavaf gu cin, me gildul, dum berik ?  
Larde tiv meinde araf, rade trak. Cin, nuyon sobliv ; rin, levplekun gu ayik isu levetiraf, va  
vordava guon sokekel, va flek solevgal, va milkava sokikasul ; ise viele rinaf feliik estur, va  
kona niska pu rin anton kabur. Voxen va cin folil ; va milkava zurtel azen volant plekutuv  
enide vol aelesitit. » Vakol va bata dragera malterektar ; azen idatcol, kolanison va  
namulolsuxe, va vakol taneon laridagabed.

Kuba kazawana gan relmesik va guga sotir mana.

Kuda ke Aisopos, -VI<sup>e</sup>aafa decemda ( kalkotavaks gan Yurani Andergan )